

巢氏諸病源候總論卷九

時氣病諸候 凡四十三論

時氣候

時行病者是春時應暖而反寒夏時應熱而反冷秋時應涼而反熱冬時應寒而反溫非其時而有其氣是以一歲之中病無長少率相似者此則時行之氣也從春分後其中無暴大寒不冰雪而人有壯熱爲病者此則屬春時陽氣發於冬時伏寒變爲溫病也從春分以後至秋分節前天有暴寒者皆爲時行寒疫也一名時行傷寒此是節候有寒傷於人非觸冒之過也若三月四月有暴寒其時陽氣尙弱爲寒所折病熱猶小輕也五



巢氏諸病源候總論卷九

時氣病諸候 凡四十三論

時氣候

時行病者是春時應暖而反寒夏時應熱而反冷秋時應涼而反熱冬時應寒而反溫非其時而有其氣是以一歲之中病無長少率相似者此則時行之氣也從春分後其中無暴大寒不冰雪而人有壯熱爲病者此則屬春時陽氣發於冬時伏寒變爲溫病也從春分以後至秋分節前天有暴寒者皆爲時行寒疫也一名時行傷寒此是節候有寒傷於人非觸冒之過也若三月四月有暴寒其時陽氣尙弱爲寒所折病熱猶小輕也五



月六月陽氣已盛爲寒所折病熱則重也七月八月陽氣已衰爲寒所折病熱亦小微也其病與溫及暑病相似但治有殊耳然得時病一日在皮毛當摩膏火灸愈不解者二日法針服行解散汗出愈不解三日復發汗若大汗卽愈不解止勿復發汗也四日服藜蘆丸微吐愈若病固藜蘆丸不吐者服赤豆瓜蒂散吐已解視病者尙未了者復一法針之當解不愈者六日熱已入胃乃與雞子湯下之愈百無不如意但當諦視節度與病耳食不消病亦如時行俱發熱頭痛食病當速下之時病當待六七日下之時病始得一日在皮二日在膚三日在肌四日在胸五日入胃入胃乃可下也熱在胃

外而下之熱乘虛便入胃然病要當復下之不得下胃
中餘熱置此爲病二死一生此輩不愈胃虛熱入胃爛
微者赤斑出五死一生劇者黑斑出十死一生病人有
強弱相倍也若得病無熱但狂言煩躁不安精神語言
與人不相主當者勿以火迫但以猪苓散一方寸匕已
上飲之以一升若升半水可至二升益佳當以新汲井
水強令飲之以指刺喉中吐之隨手愈不時吐者此病
皆多不差勿以餘藥治也不相主當必危若此病不時
以猪苓散吐解之者其殆速死亦可先以法針之尤佳
以病者過日不以時得下之熱不得泄亦胃爛矣其湯
熨針石別有正方補養宣導今附於後

養生方導引法云清旦初起以左右手交互從頭上挽
兩耳舉又引鬢髮卽流通令頭不白耳不聾又摩手掌
令熱以摩面從上下二七止去肝氣令面有光又摩手
令熱令熱從體上下名曰乾浴令人勝風寒時氣寒熱
頭痛百病皆愈

時氣一日候

時氣病一日太陽受病太陽爲三陽之首主於頭項故
得病一日頭項腰痛

時氣二日候

時氣病二日陽明受病陽明主於肌肉其脈絡鼻入目
故病二日肉熱鼻乾不得眠夫諸陽在表始受病故可

摩膏火灸發汗而愈

時氣三日候

時氣病三日少陽受病少陽脈循於脇上於頸耳故得病三日胸脇熱而耳聾也三陽經絡始相傳病未入於藏故可汗而愈

時氣四日候

時氣病四日太陰受病太陰爲三陰之首三日已後諸陽受病訖卽傳之於陰太陰之脈主於喉嗑故得病四日腹滿而噎乾其病在胸鬲故可吐而愈也

時氣五日候

時氣病五日少陰受病少陰脈貫腎絡肺繫於舌故得

病五日口熱舌乾而引飲其病在腹故可下而愈

時氣六日候

時氣病六日厥陰受病厥陰脈循陰器絡於肝故得病六日煩滿而陰縮此爲三陰三陽俱受病毒氣入於腸胃故可下而愈

時氣七日候

時氣病七日法當小愈所以然者陰陽諸經傳病竟故也今病不除者欲爲再經病也再經病者謂經絡重受病也

時氣八九日已上候

時氣病八九日已上不解者或是諸經絡重受於病或

已發汗吐下之後毒氣未盡所以病不能除或一經受病未卽相傳致使停滯累日病證不改者故皆當察其證候而治之

時氣取吐候

夫得病四日毒在胸鬲故宜取吐有得病二三日便心胸煩滿此爲毒氣已入或有五六日已上毒氣猶在上焦者其人有痰實故也所以復宜取吐也

時氣煩候

夫時氣病陰氣少陽氣多故身熱而煩其毒氣在於心而煩者則令人悶而欲嘔若其人胃內有燥糞而煩者則謬語時繞臍痛腹爲之滿皆當察其證候也

時氣狂言候

夫病甚則棄衣而走登高而歌或至不食數日踰垣上屋所上非其素時所能也病反能者皆陰陽爭而外並於陽四支者諸陽之本也邪盛則四支實實則能登高而歌熱盛於身故棄衣而走陽盛故妄言罵詈不避親戚大熱遍身狂言而妄見妄聞之

時氣嘔候

胃家有熱穀氣入胃與熱相并氣逆則嘔或吐下後飲水多胃虛冷亦爲嘔也

時氣乾嘔候

熱氣在於脾胃或發汗解後或大下之後胃內不和尙

有蓄熱熱氣上熏故心煩而嘔也

時氣噦候

伏熱在胃令人胸滿則氣逆氣逆則噦若大下後胃氣虛冷亦令致噦也

時氣嗽候

熱邪客於肺上焦有熱其人必飲水水停心下則上乘於肺故上氣而嗽也

時氣渴候

熱氣入於腎藏腎惡燥熱氣盛則腎燥腎燥故渴而引飲也

時氣衄血候



時氣衄血者五臟熱結所爲心主於血邪熱中於手少
陰之經客於足陽明之絡故衄血也衄者血從鼻出也
時氣吐血候
諸陽受病不發其汗熱毒入深結在五藏內有瘀血積
故令吐血也

時氣口瘡候

發汗下後表裏俱虛而毒氣未盡熏於上焦故喉口生
瘡也

時氣喉咽痛候

陰陽隔絕邪客於足少陰之絡毒氣上熏攻於咽喉故
痛或生瘡也

時氣發斑候

夫熱病在表已發汗未解或吐下後熱毒氣不散煩躁
謬言語此爲表虛裏實熱氣躁於外故身體發斑如錦
文凡發斑不可用發表藥令瘡開泄更增斑爛表虛故
也

時氣毒攻眼候

肝開竅於目肝氣虛熱毒乘虛上衝於目故赤痛或生
翳赤白膜息肉及瘡也

時氣毒攻手足候

熱毒氣從臟腑出攻於手足手足則焮熱赤腫疼痛也
人五藏六府并榮合皆出於手足指故此毒從內而出

也

時氣胞瘡候

夫表虛裏實熱毒內盛則多發胞瘡重者周布遍身其狀如火瘡若根赤頭白者則毒輕若色紫黑則毒重其瘡形如登豆亦名登豆瘡

時氣瘙瘡候

夫病新瘥血氣未復皮膚尙虛疎而觸冒風日則徧體起細瘡瘙痒如癬疥狀名爲逸風

時氣蠃候

毒氣結在腹內穀氣衰毒氣盛三蟲動作食人五臟多令洩利下部瘡痒若脣內生瘡但欲寐者此蟲食下部

也重者肛爛見五藏也

時氣熱利候

此由熱氣在於腸胃挾毒則下黃赤汁也

時氣膿血利候

此由熱傷於腸胃故下膿血如魚腦或如爛肉汁壯熱而腹疔痛此濕毒氣所爲也

時氣蠶利候

夫熱蓄在藏多令人下利若毒氣盛則變膿血因而成蠶蠶者蟲食人五藏及下部也若食下部則令穀道生瘡而下利名爲蠶利若但生瘡而不利者爲蠶也

時氣大便秘不通候



此由脾胃有熱發汗太過則津液竭津液竭則胃乾結熱在內大便不通也

時氣小便不通候

此由汗後津液虛少其人小腸有伏熱故小便不通也

時氣陰陽毒候

此謂陰陽二氣偏虛則受於毒若病身重腰脊痛煩悶面赤斑出咽喉痛或下利狂走此爲陽毒若身重背強短氣嘔逆脣青面黑四支逆冷爲陰毒或得病數日變成毒者或初得病便有毒者皆宜依證急治失候則殺人

時氣變成黃候



夫時氣病濕毒氣盛蓄於脾胃脾胃有熱則新穀鬱蒸不能消化大小便結澀故令身面變黃或如橘柚或如桃枝色

時氣變成瘧候

病後邪氣未散陰陽尙虛因爲勞事致二氣交爭陰勝則發寒陽勝則發熱故令寒熱往來有時休作而成瘧

時氣敗候

此謂病後餘毒未盡形證變轉久而不瘥陰陽無復綱紀名爲敗病

時氣勞復候

夫病新瘥者血氣尙虛津液未復因卽勞動更成病焉

若言語思慮則勞於神梳頭澡洗則勞於力未堪勞而強勞之則生熱熱氣還經絡復爲病者名曰勞復

時氣食復候

夫病新瘥者脾胃尙虛穀氣未復若卽食肥肉魚鱸餅餌棗栗之屬則未能消化停積在於腸胃使脹滿結實因更發熱復爲病者名曰食復也

時氣病瘥後交接勞復候

夫病新瘥者陰陽二氣未和早合房室則令人陰腫入腹腹內疝痛名爲交接勞復

時氣病後陰陽易候

陰陽易病者是男子婦人時氣病新瘥未平復而與之